

ESKORIATZAN HILETA EDO OMENALDI ZIBILAK EGITEKO ORDENANTZA

ATARIKOA

Estatu ez-konfesional edo laiko batean, gauza jakina da gizartean erakundeek pertsonen eta elkarteen askatasun ideologiko eta erlijiosoa eta gurtzarako askatasuna bermatu behar dutela, eta horretarako muga bakarra legeak ezartzen duen ordena publikoa errespetatzeko beharra da. Bestalde, gure gizartean aniztasun ideologikoa, erlijiosoa eta kulturala da nagusi, gizarte plurala baita, eta ohituren eta ekintza sozialen adierazpenak etengabe ari dira aldatzen.

Hil ondorengo hileta edo omenaldi zibilak egiteko behar soziala erlijiorik gabe bizitzea aukeratu duten herritarrei zeremonia duina eta pertsonala eskaintzeko beharretik sortu da, herritar horiek bizitza ulertzeko duten modua errespetatzeko.

Gure gizartean edo herrian bertan elkarren ondoan bizi diren erlijioek hildakoei agur esateko liturgia-ekitaldiak egiteko toki edo tenpluak dituzten bezala, Eskoriatzako Udalak gizartean gero eta eskaera handiagoa duen behar bati erantzun behar dio.

Ordenantza honen helburua, beraz, Eskoriatzako gizarte zibila osatzen duten familiek, adiskideek, erakundeek edo taldeek beren hildakoak omentzeko edo horiei agurtzeko egin nahi dituzten ekitaldiak baimentzeko arauak ematea da, hala, pertsona horien ekarpenak edo balio etikoak edota gizatiarrak onartzeko.

I. KAPITULUA. XEDEA

1. artikulua.

Ordenantza honen xedea da hildakoei Eskoriatzako udalerrian hil ondorengo hileta ospakizun edo omenaldi zibilak egiteko baimena eman eta udal lokalen erabilera arautzea.

II. KAPITULUA. BAIMENA

2. artikulua.

Alkateak edo hori ordezkatzeko duen zinegotziak edo Alkatearen ordezkariak elizate bakoitzean (auzo alkateak) hileta edo omenaldi zibiletarako gordetako espazioak erabiltzea baimendu ahal izango du, betiere, senitartekoak edo dagokionak Eskoriatzako Udaleko erregistrora bidali beharreko agiriak jaso ondoren.

III. KAPITULUA. PROZEDURA HASTEA

3. artikulua.

Hileta edo omenaldi zibilak egiteko eskaerak Eskoriatzako Udaleko Alkateari zuzenduko zaizkio, edo landa gune bateko espazio publikoren batean egitea gura baldin bada Auzo-alkateari, eta azaroaren 26ko 30/1992 Legeak, Herri Administrazioen Araubide Juridikoaren eta Administrazio Prozedura Erkidearenak, zehaztutako edozein bide erabili ahal izango da horretarako.

4. artikulua.

Hileta edo omenaldi zibilak eskaeraren izapideak egoera horrek beharrezkoa duen berehalakotasun printzipioaren arabera arautuko dira, eta horretarako eskumena duen pertsonari igorriko zaizkio ebazpena eman dezan.

5. artikulua.

Egingo diren eskaeretan honako datu hauek adierazi beharko dira:

a) Ospakizuna egiteko baimena eskatzen duen pertsonaren izen-abizenak, helbidea eta identifikazioa.

b) Hildako pertsonaren izen-abizenak eta Heriotza Ziurtagiria.

c) Eskaeran hileta edo omenaldi zibila zein egunetan eta zein ordutan egin nahi diren adierazi behar da.

d) Oro har, eta herrigunean, ospakizun horiek ondorengo eraikin edo gune publikoetan egingo dira:

- Ibarraundi Museoa.

- Udal pilotalekua

- Santa Marina plaza

- Eduardo Gorosarri plaza

Landa guneetan auzo alkateek, Alkatearen oniritziarekin, izendatutako lekuetan egingo da.

e) Eskaera egin den lekua eta data.

f) Eskatzailearen sinadura edo haren borondatearen egiazkotasunaren egiaztagiria, edozein euskarritan.

g) Ekitaldiaren deskribapen laburra, eta beharko duten materialarena (megafonia, mahaia, aulkiak eta abar).

h) Ekitaldiaren iraupena.

6. artikulua.

Eskaerak aurreko artikulua zehaztutako baldintzak betetzen ez baditu, interesdunari lehenbailehen eskatuko zaio akatsa zuzentzeko edo aurkeztu beharreko agiriak aurkezteko, ekitaldiaren aurretik edo ondoren.

IV. KAPITULUA. PROZEDURAREN INSTRUKZIOA EGITEA

7. artikulua.

Hileta edo omenaldi zibila egiteko eguna eta ordua Alkateak edo horren ordezkoko zinegotziak edo auzo alkateak zehaztuko du.

Eskaerak aurkeztu diren ordena zorrotzean egingo da Instrukzioa, bestalde, ahal den heinean, eskatzaile bakoitzak zehaztutako lehentasunen ordena errespetatuko da. Aparteko eta presazko beharrian objektibo baten ondorioz, gerta daiteke eskaerak aurkezteko ordena ez errespetatzea. Dena den, aparteko eta presazko beharrian gertatzeko nahikoa arrazoi izan beharko da, eta beren eskubideei eragiten zaienean pertsona horiei entzun egin beharko zaie.

8. artikulua.

Eskaera egin ondoren, Alkateak edo horren ordezkoko zinegotziak edo auzo alkateak hileta edo omenaldi zibila zein lokaletan edo espazio publikotan egin baimenduko du; oro har, hileta edo omenaldi zibila 5. artikuluan finkatutako lekuren batean izango da. Aparteko izaeraz, beste lokal batzuk edo espazio publikoak erabiltzea baimendu ahal izango da.

9. artikulua.

Hileta edo omenaldi zibilak astelehenetik igandera ospatuko dira, eta beharrezko udal baliabideak jarriko dira zeregin horretarako. Erabilitako udal baliabideak kobratzeko, erabilera unean indarrean dauden ordenantza fiskaletan araututakoari jarraituko zaio.

10. artikulua.

Hileta edo omenaldi zibila ospatzeko ordutegia ondokoa izango da: 9:00etatik 14:00etara, eta 17:00etatik 21:00etara.

11. artikulua.

Hileta edo omenaldi zibila ospatzeko ekitaldiak irauten duen bitartean, Eskoriatzako Udaltzaingoa izango da kanpoan, ekitaldia arazorik gabe garatuko dela bermatzeko.

III. KAPITULUA. ESKUBIDEAK ETA BETEBEHARRAK

12. artikulua.

Udal lokalen zainketa egokia bermatzeko, zeremonian parte hartuko dutenek ez dute lokaletan kalterik edo galerarik eragin dezakeen inolako ekintzarik egingo. Ekintza egiterakoan udal ondasunetan sor daitezkeen kalte-galeren erantzulea baimenaren titularra izango da.

13. artikulua.

Hildakoaren senitartekoek edo adiskideek udal lokala apaindu nahi badute edo modu bereziren batean egokitu nahi badute, aurrez eta nahikoa denboraz horren berri eman beharko diote udaltzaingoari, honek hartu beharreko erabakiak har ditzan; hala ere, lekuaren harmonia eta ezaugarriak errespetatu beharko dituzte beti, eta sor daitezkeen gastuak beren gain hartu beharko dituzte. Ekitaldia egiteko zerbitzu osagarriak interesdunaren kontura eta kargura izango dira, baina, betiere, Eskoriatzako Udalak ikuskatu ahal izango ditu.

14. artikulua.

Salbuespen gisa hileta edo omenaldi zibila egiteko 5. artikuluan aurreikusi gabeko espazio publikoren bat erabiltzea baimenduko balitz, Udalak espazio publikoa mugatu ahal izango du lehen aipatutako eskubide eta betebeharrekin.

15. artikulua.

Ordenantza honetan aurreikusten ez den edozein alderdietarako, udal arduradunen aginduak hartuko dira kontuan.

XEDAPEN GEHIGARRIA

Eskoriatzako Udaleko Alkatetzari ordenantza hau aplikatzeko egin beharreko jarduketa guztiak egiteko ahalmena ematen zaio.

AZKEN XEDAPENA

Ordenantza hau behin betiko testua Gipuzkoako Aldizkari Ofizialean argitaratu ondorengo egunean jarriko da indarrean, eta Udalbatzak berau aldatzeko edo indargabetzeko erabakia hartu arte izango da indarrean.